



11. september 2020

UKA 2020/62

Inatsisartut Suleriaasianni § 36 naapertorlugu oqallisissiatut siunnersuut imaattoq matumuuna saqqummiuppara:

Kalaallit Nunaanni imminortarnernik nuna tamakkerlugu pinaveersaartitsitsinermut periusissiaq atuuttussamik piareersaanissamut suut immikkut isiginiarneqassanersut, kikkullu ilusilersueqataanissamut peqataatinneqassanersut oqallisissiatut siunnersuut.
(Inatsisartunut ilaasortaq Malene Vahl Rasmussen, Demokraatit)

40-t. Taama amerlatigisut Nunatsinni ukiumut agguaqatigiissillugu imminortarput. Kisitsisimullu ataatsimut ateq ataaseq atasarpoq. Inuk ataaseq.

“Kalaallit Nunaanni imminortarnernik nuna tamakkerlugu pinaveersaartitsitsinermut periusissiaq 2013-2019”-p imminortarnernut, imminoriartarnernullu suleriaatsit ataqtigiissaarneqarnissaat sammisimavaa.

Sammisamut ilisimasallit pikkorissarneqarnissaat aamma ukkatarineqarsimavoq, taamaalillutik meeqqanik inuusuttunillu sullissinermi imminortarnerit imminornissamullu eqqarsaatersortunut tulluuttunik sakkusaqartinniarlugit. ThinkInuk Livlinjen-ilu aqqutigalugit nammineq marloriarlunga pikkorissaqataasimavunga. Pikkorissarnerit aqqutigalugit Kalaallit Nunaanni meeqqanik, inuusuttunillu sanngiitsunik sullissineq qanoq innersoq, aammalu suut eqqumaffigineqartariaqarnersut paasisaqarfigisimavara.

Meeqgerivinni, meeqqat atuarfiini, ilinniarfinni, atuareersunut paaqqinnittarfinni ilinniarsimasut imminorniarluni eqqarsaatersortoqartillugu, imminoriarnerni imaluunniit imminornerni pisunut qanoq iliuuseqarnissamut piareersimanissaat pingaaruteqarluinnarpoq, inuillu taakkua sulinermi naammassisartagaat minnerusunngortissanngilavut.

Naalakkersuisut imminortarnerit ikilisarniarlugit suliuarput. Tamanna nuannaarnarpoq.¹ Ajoraluartumilli paasisimavarput sullinniakkat ilaat puigorneqartarmata. Imminornerimmi amerlanerusut meeqqat inuusuttullu akornganni pizaraluarpoq, ukiulli apeqqutaatinnagit kikkunnut tamanut ajornartorsiutaavoq. Taamaammallu pitsaannerusumik pinaveersaartitsisariaqarpugut.

Tamatumuuna Demokraatit isumaqarput Kalaallit Nunaanni imminortarnernik nuna tamakkerlugu pinaveersaartitsitsinermut periusissiamik atuuttussamik piareersaanissaq pingaaruteqarluinnarpoq, taamaattumik nuannaarutigaarput Naalakkersuisut pisortatigoortumik nalunaaruteqarmata periusissiamik sanasoqartoq². Demokraatit isumaqarput periusissiasap suliniutit iluatsissimasut tunngavigissagai, aammattaarlu imminortarnerit ikilisarnissaannut iluatsissagutta nutaanik eqqarsaatersortoqartariaqarpugut. Imminortarnernik pinaveersaartitsitsineq ”one-size-fits-all”-iunngilaq (tamanut tulluuttoq).

¹ §37 46/2020

² <https://sermitsiaq.ag/kl/imminut-toquttarnermik-pinaveersaartitsineqperiusissiaq-nutaag-saqqummiunneqassaag>



Innuttaasut Inatsisartullu pinaveersaartitsinissamut nutaamut qaangiuteqqammisumit annerusumik peqataatinneqarnissaat Demokraatinut pingaaruteqarpoq. Innuttaasut periusissiami 2013-2019-mi toqqaannartumik ilaatinneqarsimangillat, innuttaasut ajornannginnerpaamik ikiorneqarnissaat anguniarlugu sammisamut ilinniagallit salliutinneqarsimmata. Sammisamut ilinniagallit, kommuunit, politikerit, nammineq piumassutsimik suliniaqatigiiffiit, sianissutsit peqqinnissaanut sungiusaasut, peqqinnissaqarfik, politiit, kommuunit, politikerit, minnerunngitsumillu eqqungaasimasut, taakkumi tassaammata pineqartut, suleqatigalugit siunissami qanoq iliorluta imminortarnerit pinaveersaartissanerlutigit issaalluta eqqartueqatigiinnissarput piffissanngorpoq.

Periusissiap sammisassaaturt uku innersuukkusuppagut:

- Periusissiami pinaveersaartitsineq takuneqarsinnaasoq qanoq ilanngunneqarsinnaanersoq
- Pinaveersaartitsinermi maligassiuisunik qanoq peqataatitsinnaanersugut
- Innuttaasut akornganni qanoq ililluta imminortarneq pillugu oqaloqatigiinnerneq, ammanerunerlu siuarsarsinnaanergit
- Imminorusullutik eqqarsaatersortoqartillugu, imminoriartoqartillugu imaluunniit imminortoqartillugu innuttaasut saaffiginniffissaanik qanoq ittunik pisariaqartitsinersugut, tassungalu atatillugu oqarasuaatikkut attavigineqarsinnaasoq nammannersoq
- Siunissami qanoq ililluta ilisimasanik katersisassanersugut, ilisimasallu ulluinnarni qanoq atorneqartassanersut

Neriullunga kusanartumik angusaqarfiusumillu oqallittoqassasoq.